

दिनांक 17.01.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- प्रधानमंत्री नरेन्द्र मोदी कह्यो—देश मांय लारला चार साल मांय वाहन निर्माण हलका मांय 36 अरब डॉलर ऊं बत्तो प्रत्यक्ष विदेशी निवेश व्ह्यो—प्रधानमंत्री रो काल स्वामित्व योजना रा तैत 65 लाख ऊं बत्ता सम्पत्ति कार्ड देवण रो कार्यक्रम।
- लोकसभा अध्यक्ष ओम बिरला जयपुर मांय **भारत सोलर एक्स्पो** रो उद्घाटन कीनो।
- स्वास्थ्य हलकां रा केई मानकां मांय राजस्थान रो प्रदर्शन देश रा औसत ऊं बेहतर—छह करोड़ जणां री आभा आईडी बणायी ज्यी।
- शिक्षा मंत्री मदन दिलावर कह्यो—प्रदेश मांय बोर्ड री परीक्षावां पाछे शिक्षकां रा तबादला री प्रक्रिया सरू व्हेवण री उम्मीद।

000

प्रधानमंत्री नरेन्द्र मोदी कह्यो है के देश रा वाहन उद्योग कानी ऊं बणायी ज्यी मोटर—गाड़ियां री तादाद मांय लारला साल बारह फीसदी री बधोतरी व्ही। वे आज नई दिल्ली रा भारत मंडपम् मांय छह दिन चालण वाळा भारत मोबिलिटी ग्लोबल एक्सपो 2025 रा उद्घाटन सत्र मांय बोल रह्या हा। श्री मोदी कह्यो के भारत मौजूदा दौर मांय दुनिया रो तीजो मोटो यात्री वाहन बाज़ार है। वे कह्यो के **मेक इन इंडिया पहल** ऊं देश रा वाहन उद्योग ने बधावो मिल रह्यो है।

.....
प्रधानमंत्री कह्यो के उत्पादन ऊं जुड़ी पीएलआई योजना **मेक इन इंडिया अभियान** ने और तेज़ कीनो है अर इण ऊं सवा 2 लाख करोड़ रुपया ऊं बत्ता मोल री गाड़ियां री बिक्री व्ही। वे कह्यो के ई

योजना ऊं वाहन बणावण रा हलका मांय डोढ़ लाख ऊं बत्ती नौकरियां मिली। प्रधानमंत्री कह्यो के लारला चार साल मांय ऑटो सेक्टर मांय 36 अरब डॉलर ऊं बत्ती रकम रो विदेशी प्रत्यक्ष निवेश व्ह्यो है। ई मौके केन्द्रीय उद्योग मंत्री पीयूष गोयल कह्यो के भारत तिपहिया वाहन अर ट्रेक्टर बणावण वाळो ई सब ऊं मोटो देश बण ग्यो है। ई ऑटो एक्सपो मांय आठ सौ प्रदर्शक वां रा उत्पाद रो दरसाव कर रह्या है।

000

प्रधानमंत्री नरेंद्र मोदी रो काल स्वामित्व योजना रा तहत वीडियो कॉन्फ्रेंस रे मार्फत 65 लाख ऊं बत्ता सम्पत्ति कार्ड बांटण रो कार्यक्रम है। दस राज्यां अर केन्द्र रा राज वाळा दो प्रदेशां रा पचास हजार ऊं बत्ता गांवां अर 230 ऊं बत्ता जिलां मांय सम्पत्ति रा मालिकां ने अ कार्ड दिया जावेला। स्वामित्व योजना रा तहत गांवांई हलकां मांय नुवी ड्रोन तकनीक रे जरिये सर्वे कर र घरां रा मालिकां ने मालिकाना हक दिया जावे है।

000

लोकसभा अध्यक्ष ओम बिरला आज जयपुर मांय **भारत सोलर एक्सपो** रो उद्घाटन कीनो। तीन दिन रो ओ आयोजन ऊर्जा विभाग अर राज्य सोलर एसोसिएशन री ओर ऊं कर्यो जा रह्यो है। ई मौके श्री बिरला कह्यो के आवता बगत मांय राजस्थान सूरज री रोशनी ऊं बिजली रा हलका मांय मोटो हब बणेला। वे कह्यो के नवीकरणीय ऊर्जा रा हलका मांय राज्य मांय चोखो काम व्हे रह्यो है।

ई आयोजन मांय डोढ़ सौ ऊं बत्ती स्टॉलां रे मार्फत नुवी सौर अर नवीकरणीय ऊर्जा प्रौद्योगिकियां रो दरसाव कर्यो जा रह्यो है।

राज्यपाल हरिभाऊ बागड़े "विकसित भारत" बणावण सारु सगळां ऊं "राष्ट्र प्रथम" री सोच सागे मिल र काम करण बाबत् कह्यो है। श्री बागड़े आज जयपुर मांय '**द डूँढाड़ टॉक**' कार्यक्रम मांय बोल रह्या हा। ई मौके वे कह्यो के नौजवानां ने देश रा भला ने कर्तव्य मानता थकां विकास मांय भागीदार बणणा चाहिजे।

000

प्रधानमंत्री नरेन्द्र मोदी आकाशवाणी ऊं प्रसारित कर्या जावण वाळा खास कार्यक्रम **मन की बात** मांय 19 जनवरी दीतवार ने विचार

बतावेला। आकाशवाणी ऊं ओ कार्यक्रम दस साल ऊं बत्ता बगत ऊं प्रसारित कर्यो जा रह्यो है। ई महीना मन की बात कार्यक्रम री 118वीं कड़ी प्रसारित करी जावेला। ओ कार्यक्रम संवारे 11 बज्यां आकाशवाणी अर दूरदर्शन रा पूरा नेटवर्क माथे प्रसारित कर्यो जावेला।

000

मुख्यमंत्री भजनलाल शर्मा कह्यो है के सरकार स्वास्थ्य सेवावां ने बधावण अर और मजबूत बणावण सारू काम कर रही है। वे कह्यो के अस्पतालां मांय जापा, टीका लगावण अर चिकित्सा संस्थानां री उपलब्धता समेत केई मानकां मांय राजस्थान रो प्रदर्शन देश रा औसत ऊं बेहतर है। श्री शर्मा आज चिकित्सा अर स्वास्थ्य हलका रा नुमाइन्दां सागे बजट ऊं पैली री चर्चा रे दौरान बोल रह्या हा। वे कह्यो के जनता रा स्वास्थ्य ऊं जुड़्या दस्तावेज डिजिटल तरीका ऊं राखण सारू हाल ताई छह करोड़ जणा री आभा आईडी बणायी जा चुकी है। श्री शर्मा कह्यो के आभा आईडी बणावण रा मामला मांय राजस्थान देश मांय दूजा पायदान माथे है।

वे बतायो के प्रदेश मांय 11 हजार 571 आयुष्मान आरोग्य मंदिर काम कर रह्या है। मुख्यमंत्री कह्यो के राज्य सरकार बेगो ई चिकित्सा विभाग मांय करीब पचास हजार ओहदा माथे भर्तियां रो मुकाम हासिल करेला।

000

भीलवाड़ा मांय आज सांसद जन संवाद केन्द्र सरू व्ह्यो। सांसद दामोदर अग्रवाल इण रो उद्घाटन कीनो। ई मौके वे कह्यो के संवाद केन्द्र मांय वां री टीम अर भाजपा रा कार्यकर्ता जनता री समस्यावां री सुणवाई करेला। श्री अग्रवाल आज भीलवाड़ा मांय आरजिया चौराहा ऊं सुखाड़िया सर्किल ताई बणायी ज्या साइकिल ट्रैक री सरूआत ई कीनी।

000

प्रदेश मांय बोर्ड रा इम्तिहान पाछे शिक्षकां रा तबादलां रो काम सरू करण री योजना है। शिक्षा मंत्री मदन दिलावर चित्तौडगढ़ रा श्री सांवलियाजी मांय चाल रह्या राजस्थान शिक्षक संघ रा प्रदेश शैक्षिक सम्मेलन मांय आ जाणकारी दीनी। वे कह्यो के बोर्ड रा इम्तिहान पाछे अध्यापकां रा तबादला रा बारा मांय नीति बणायी जावेला। दूजी कानी

झुंझुनूं मांय आज राजस्थान शिक्षक संघ सियाराम रो प्रांतीय अधिवेशन सरू व्हयो। दो दिन रा ई सम्मेलन रा उद्घाटन जळसा मांय नगरीय विकास अर आवासन मंत्री झाबर सिंह खर्चा कह्यो के शिक्षकां ने गंभीरता सागे दायित्व पूरा करता थकां नुवी पीढी तैयार करणी चाहिजे।

श्री खर्चा कह्यो के नगरीय हलकां मांय सीमा विस्तार रा मामला माथे विचार सारू मंत्रिमंडलीय उपसमिति बणायी ज्यी है।

000

प्रदेश मांय शिक्षा विभाग आठवीं कक्षा ताई रा बच्चां री तीन विषयां मांय कमजोरियां री ठा करण री पहल कीनी है। मुख्यमंत्री शिक्षित राजस्थान अभियान रा तैत ई री सरूआत करी ज्यी है। पेश है एक रपट —

000

राष्ट्रपति द्रौपदी मुर्मू आज खिलाड़ियां ने राष्ट्रीय खेल पुरस्कार दे र नवाजा। राष्ट्रपति भवन मांय राख्यी ज्या जळसा मांय चार खिलाड़ियां ने मेजर ध्यानचंद पुरस्कार, पांच खिलाड़ियां ने द्रोणाचार्य पुरस्कार अर बत्तीस खिलाड़ियां ने अर्जुन पुरस्कार ऊं नवाजी ज्या। अर्जुन पुरस्कार ऊं नवाजा जावण वाळां मांय शामिल राजस्थान री पैरा निशानेबाज मोना अग्रवाल कह्यो कह्यो के अ लम्हा वां सारू माथो ऊंचो करण वाळा है।

000

मौसम विभाग प्रदेश रा 24 जिलां मांय धुंअर रेहवण अर चार जिलां मांय शीतलहर रो येलो अलर्ट जारी कीनो है। ई बीच माउंट आबू मांय आज न्यूनतम तापमान 1 डिग्री सेल्सियस ऊं नीचे उतर ग्यो। सिरौही मांय 3 दशमलव 8 अर सीकर मांय 4 डिग्री सेल्सियस न्यूनतम तापमान दर्ज करी ज्यो। राजधानी जयपुर मांय काल व्ही मावठ रे कारण ठण्ड रो असर बध ग्यो अर दिन री बगत ई सीळो बायरो बाजण ऊं ठिटुरन महसूस करी ज्यी। ई बीच मौसम विभाग 31 जनवरी ताई जोरदार ठण्ड पड़बा रा आसार जताया है। महकमा रे मुजब 22 जनवरी ऊं एक

और तंत्र सक्रिय व्हेवण ऊं राज्य रा उत्तराद —ऊगणी हलका मांय बिरखा री संभावना है।

000

पाली मांय आज मुख्यमंत्री सद्भावना केंद्र री सरूआत करी ज्यी। जिला कलेक्टर एल एन मंत्री और नगर निगम रा कमिश्नर नवीन भारद्वाज इण रो उद्घाटन कीनो। सद्भावना केंद्र मांय लोग कम्बल, कपड़ा अर जूता समेत काम री न्यारी—न्यारी चीजां दे सकेला, ज्यां ने जरूरतमंद लोगां ने दी जावेला।

000

कोटा ज़िला रा रामगंजमंडी मांय काल अंतरिक्ष विज्ञान शिविर सरू व्हेला। तीन दिन रा ई शिविर मांय भारतीय अंतरिक्ष अनुसंधान संगठन—इसरो रा वैज्ञानिक विद्यार्थियां ने अंतरिक्ष विज्ञान रा रहस्यां रा बारा मांय जाणकारी देवेला। ई मौके अंतरिक्ष विज्ञान प्रदर्शनी ई लगायी जावेला। ई सारु विक्रम साराभाई अंतरिक्ष अनुसंधान केन्द्र री नुवी गाड़ी कोटा पूग गयी है। ई रे मार्फत विद्यार्थियां ने चंद्रयान अर रॉकेट छोड़ण री तकनीकां री जाणकारी दी जावेला।

000